



Peter Olsen  
Inatsisartunut ilaasortaq, Inuit Ataqtigiit

## **§ 37 naapertorlugu apeqqutinut akissutit nr. 103/2023 – ilinniagaqarnersiutit pillugit.**

28-06-2023  
Sagsnr. 2023 - 3471  
Akt nr. 23104037

Asasara Peter Olsen

Postboks 1029  
3900 Nuuk  
Tlf: +299 34 50 00  
Email: [ikin@nanoq.gl](mailto:ikin@nanoq.gl)  
[www.nanoq.gl](http://www.nanoq.gl)

Inatsisartut suleriaasiat naapertorlugu apeqquteqarninnut qujanaq. Taakku ataa-  
ni akissuteqarfigissavakka.

### ***Apeqqut 1: Naalakkersuisut ilinniagaqarnersiutit pillugit Inatsisartut inatsisaat allanngortinniarlugu pilersaaruteqarpat?***

#### **Akissut:**

Ilinniagaqarnersiuteqartitsisarneq pillugu inatsisinik, matumani aamma ilinniaga-  
qarnersiutit pillugit Inatsisartut inatsisaannik nr. 12, 22. november 2011-imeer-  
sumik, Inatsisartut inatsisaatigut nr. 16, 16. juni 2016-imi allanngortinneqartumik  
(ilinniagaqarnersiutit pillugit inatsimmik), misissueqqissaarneq aallartinneqa-  
reerpoq.

### ***Apeqqut 2: Naalakkersuisut isumaqarpat ilinniakkamik naammassisaqarsima- soq nutaamik ilinniakkamik aallartitsinermigut ilinniagaqarnersiuteqarnissa- mut qiortakkanik naammattunik pisinnaanginnera pitsaasuusoq?***

**Akissut:** Apeqqummi pineqarpoq ilinniagaqarnermi qiortakkanik taaneqartartoq,  
tak. Ilinniagaqarnersiutit pillugit Namminersorlutik Oqartussat nalunaarutaanni  
nr. 9, 19. juli 2017-imeersumi §§-it 20-miit 28-mut (ilinniagaqarnersiutit pillugit  
nalunaarut), pineqaranilu ilinniagaqarnersiutit pillugit inatsit, tassanimi taamaal-  
laat aalajangersarneqarpoq ingerlaqqiffiusumik ilinniagaqarnerni ilinniagaqar-  
nersiutit, piffissami siumut killileriigaasumi qiortakkanik aqqissuussineq malillu-  
gu tunniunneqartassasut.

Qiortakkanut killissarititaq ilinniagaqarnersiutit pillugit nalunaarut naapertorlugu  
ukiut arfineq-marluk tikillugit qiugassanik imaqarpoq, tassa ima paasillugu inger-  
laqqiffiusumik ilinniakkanik ilinniagaqarnermi ukiut arfineq-marluk missaanni

ilinniagaqarnersiutit qiugassanut 82-inut naapertuuttut. Oqaatigineqassaaq tamanna maleruagassanut siusinnerusukkut atuuttunut sanilliullugu pitsanngoriaataamat, tassami ilinniarsimasutut ilinniakkamut naammassisamut ataasiinnarmut ilinniagaqarnersiutinik tunniussisoqarsinnaasimagaluarmat.

Maleruagassat imaapput, ilinniagaqartoq assersuutigalugu bachelorinngorniarluni soorlu ukiuni pingasuni ilinniakkaminik naammassinnissimappat, qiugassanillu 34-nik tassunga atuisimalluni, taava qiugassanik suli 48-nik sinneqassaaq ingerlaqqiffiusumik ilinniakkamut allamut atorsinnaasaminik. Aaqqissuussineq ingerlaqqiffiusumik ilinniakkanut taamaallaat atuummat tamanna aamma isumaqarpoq, ilinniagaqartoq soorlu inuussutissarsiutinut ilinniakkamik imaluunniit ilinniagaqarnissamut piareersaatitut ilinniakkamik ingerlataqareersimaguni, qiugassanik ilanngarneqanngitsunik suli 82-iusunik atorsinnaasaminik peqassammat, tak. ilinniagaqarnersiutit pillugit nalunaarummi § 21.

Ilinniagaqartup ilinniagaq ingerlatani napparsimaneq, qitornartaarneq, qitornavissiartaarneq imaluunniit ilinniakkamut attuumassutilimmik sulineq pissutigalugu kinguaattoorfigiguniuk qiugassanut killissaritit 82-it atorsinnaasami saniatigut qiugassanik allanik aamma tunineqarnissamut akuerineqarsinnaavoq, tak. ilinniagaqarnersiutit pillugit nalunaarummi §§-it 24 aamma 26, tak. § 23, imm. 2, oqaaseqatigiit siullit.

Maleruagassalli ima paasineqassanngillat, ilinniagaqartup ingerlaqqiffiusumik ilinniakkanik tamakkiisunik marlunnik inuiaqatigiit akiligaannik ilinniagaqarnersiuteqartinneqarnissani naatsorsuutigisinnaassagaa. Tassa imaappoq, ilinniagaqartup ingerlaqqiffiusumik ilinniakkamik naammassinneriarluni ingerlaqqiffiusumik ilinniakkamik allamik allartitserusulernera pissutigiinnarlugu qiugassat atorsinnaasat amerlinaviangillat. Ilinniagaqarnersiutit pillugit maleruagassat inuiaqatigiit sulisussanik ilinniarsimasunik, inuiaqatigiinni suliassat isumagineqarneranni suleqataasinnaasunik, taamaalillutillu inuiaqatigiit imminnut aningaasatigut napatinnissaannut peqataasussanik pisariaqartitsinerannut toqqaannartumik attuumassuteqartinneqassapput.

Maleruagassat, ilinniagaqarnersiutit pillugit peqqussutip nr. 5, 14. november 2004-meersup Inatsisartunit taamanikkut akuersissutigineqarneratigut qiugassanik taaneqartunik atuutilersitsinermut attuumassuteqartinneqassapput. Taamanikkut kissaataasut ilagaat ilinniagaqartut ilinniakkaminnik suliarilerumaagassaminnullu pilersaarusiornerminni akisussaassuseqarnerunissaat piginnaasaqarnerunissaallu, aammalu amerlanerit ilinniakkamik namminerminnut naleqquttumik toqqaanissaat.

Maleruagassat taamaannerannut tunngavisorinarpoq ilimagineqarsimassasoq, ilinniagaqartup ingerlaqqiffiusumik ilinniagaqarnerani ilinniagaqarnersiutai inuiaqatigiinnit akilerneqareerpata, taava aamma ilinniagaq taanna inuiaqatigiinni atornerqarnermigut inuiaqatigiinnut iluaqutaasariaqassasoq.

Naalakkersuisut tassunga atatillugu isumaqarput ilinniakkat Nunatta pisariaqar-tilluinngai, soorlu meeqqat atuarfianni ilinniartitsisutut ilinniakkat, inuiaqatigiit ilinniagaqarnersiuteqartitsinermikkut akilersugaat Nunatsinni inuiaqatigiinnit ilu-aqutigineqanngippata tamanna uggornartuusooq.

***Apeqqu 3: Ilinniakkamik naammassisaqarsimasooq nutaamik ilinniakkamik aallartitsinermigut ilinniagaqarnersiuteqarnissamut qiortakkanik amikkitsi-soorani ilinniakkani naammassisinnaalissappagu tamanna nunatta karsianut qanoq naleqassava?***

**Akissut:**

Siullermik oqaatigineqassaaq ingerlaqqiffiusumik ilinniakkap suli ataatsip inger-lannissaanut qiugassat qassit pisariaqartinneqarnersut aningaasartuutaajumaar-tussanut aalajangiisuusussammata. Taassuminnga naatsorsuinissami Nunatsin-ni ingerlaqqiffiusumik ilinniakkanut atatillugu maanna ilinniagaqarnersiutitut tunniunneqartartut qaammammut 4.834 kr.-it aallaavigineqaannarsinnaapput. Taakkununnga ilanngunneqassapput semesterimut ataatsimut atuakkanut tapit 1.100 kr.-it, immaqalu ukiumoortumik feriarnermi akiliunneqarluni angalanerit ukiumut 10.000 kr.-it missingi. Kiisalu ilanngunneqartariaqarput ilinniakkamik aallartitsinermi naammassinninnermilu imaluunniit ilinniakkamik unitsitsiinnar-nermi akiliunneqarluni angalanernut aningaasartuutaajunnartut. Ilanngunneqar-tussanuttaaq ilaasariaqassapput ilinniagaqarnermi taarsigassarsianik utertitsi-nermut atatillugu tapiissutit amerlissutaat, tassa ilinniakkamik nutaamik ingerla-taqarnermut atatillugu taarsigassarsinissamut periarfissaqarnerup kingunerisai.

Bacheloritut ilinniakkamut nutaamut qaammammoortumik qiugassat 36-ussap-put, ilinniagarlu kandidatinnigorniutigineqarpat qaammammut qiugassat 22-us-sallutik. Taakkununnga ilanngunneqassapput ilinniakkap immikkoortuinut mar-luusunut atatillugu paamaarussinermi qiugassat immikkut ittut 24-t, tassa ilinni-akkanik kinguaattooruteqarnernut tunngasut, taakkulu ilinniakkamik nutaarlui-narmik allamik ingerlatsinissami qiugassanik katillutik 82-inik naleqassapput.

Tamanna ilinniartumut ataatsimut ilinniagaqarnersiutaannarnik 396.388 kr.-inik naleqarpoq, ilinniagaqartoq ingerlaqqiffiusumik ilinniakkami siulliup ingerlanne-rani atugassarisami assinginik atugassaqartitaalluni ingerlaqqiffiusumik ilinniak-kamik tamakkiisumik allamik ingerlatsinissanissaa qulakkeerneqassappat.

Bacheloritut ilinniakkamut nutaamut ilinniagaqarnersiutaannaat pineqarpata, tassa kandidatimut ilinniakkamut ikaarsaarnermi aasaanerani feriarnermi qiugas-saq ilanngunnagu, taava tassungaannaq qiugassat 34-t atorneqassapput 164.356 kr.-inik naleqartut, taakkulu ilinniakkamik paamaarussinerit pissutigalugit qiugas-sat 12-it ilanngunneqassappata qiugassanut 46-nut amerlineqassapput, tassa 222.364 kr.-inik naleqartut.

Taamaassaartaaq kandidatitut ilinniakkamut allamut qiugassat 22-t ilanngunne-qassappata, 106.348 kr.-inik nalillit, taakkulu ilinniakkamik paamaarussinerit pis-

sutigalugit qiugassat 12-it ilanngunneqassappata qiugassanut 34-nut amerlineqassapput, tassa 164.356 kr. -inik naleqartut.

Ilutigisaanik oqaatigineqassaaq periarfissap taassuma kingunerissammagu qiugassatut killiliussat 82-iugaluartut marloriaatinngornissaat, tassami ilinniagaqartoq taamaalilluni 164-inik qiugassaqaalissammat, tamannalu ingerlaqqiffiusumik ilinniakkanut marlunnut qaammatini katillugit 164-ini ilinniagaqarnerisuteqarnisamik naleqassammat.

Kiisalu meeqqanut tapeqartitsisariaqarsinnaanermut aningaasartuutit ilanngunneqartariaqassapput.

Taakkununga ilanngunneqassapput semesterinut 10-nut atuakkanut tapit, ilinniagaqartumut ataatsimut 11.000 kr.-iusussat. Ilanngunneqassapputtaaq oqaatigineqareersutuut ukiumoortumik feriarnermi akiliunneqarluni angalanerit, assersuutigalugu ukiuni ikinnerpaamik 5-ini akiliunneqarluni feriarluni angalanerit 10.000 kr.-inik nalillit, taakkulu katillugit tassaassapput 50.000 kr.-it kiisalu ilinniakkamik aallartitsinermi naammassinninnermilu angalanerit assersuutigalugu tamarmik 6.000 kr.-inik nalillit, taakkulu aningaasartuutitut 12.000 kr.-inik amerlanerulersitsissapput. Taakkuttaaq saniatigut aamma ilinniakkamut nutaamut atatillugu qitornat immaqalu aapparisaq imaluunniit inooqatigisaq akiliunneqarlutik angalanerannut kiisalu pisattat nassiunnerannut aningaasartuutit ilanngunneqartussaassapput.

Ilinniagaqartulli ingerlaqqiffiusumik ilinniakkani siulleq piffissaliussap iluani naammassisinnaaguniuk qiugassat 58-iinnaat atorsimassavai, taamaalillunilu 24-nik sinneqarluni. Taavalu ilinniagaqartup ingerlaqqiffiusumik ilinniakkami tullia aammattaaq piffissaliussap iluani naammassisinnaaguniuk, taava pineqartup ingerlaqqiffiusumik ilinniakkami aappaanut qiugassat taamaallaat 34-t amigaatigissavai. Taamatut pisoqartillugu ingerlaqqiffiusumik ilinniakkap aappaata naammassineqarnissaanut qiugassanik 34-nik tunniussisoqassappat taakku ilinniagaqartumut ataatsimut 164.356 kr.-inik naleqassapput. Pisuni taamaattuni ilinniagaqartup taamaallaat qiugassat 116-it atorsimassavai, taamaalillunilu ingerlaqqiffiusumik ilinniakkaminut marlunnut qaammatini 116-ini ilinniagaqarnerisuteqarsimassalluni.

Aningaasartuutit amerlassusii ukiumoortumik naatsorsorniarneqassappata tamanna ilinniagaqartumut ataatsimut ingerlaqqiffiusumik ilinniakkamik aallartitsisumut ilinniagaqarnerisutinik ukiumut 58.000 kr.-it missinginik naleqassaaq, taakkunungalugu ilanngunneqassapput atuakkanut tapit ukiumut 2.200 kr.-it kiisalu ukiumoortumik feriarnermi akiliunneqarluni angalaneq 10.000 kr.-it missinginik naleqartoq. Aningaasat taama amerlatiginissaannut apeqqutaassaartaaq qitornanik nassataqarsimaneq. Tassunga aningaasartuutit minnerpaamik ukiumut 60.200 kr.-it missigissavaat. Taakkununga ilanngunneqassapput meeqqanut tapinut aningaasartuutit aammalu taaneqareersutuut ilinniagaqarnermi ukiumut taarsigassarsianik utertitsinermi tapiissutaajumaartussat.

Assersuutigaaanni inuit 20-t ingerlaqqiffiusumik ilinniakkamik tamakkiisumik piffissaliussap iluani ingerlatsinerminni Namminersorlutik Oqartussanit ilinniagaqarnersiutininik pisimallutik aalajangerpata ingerlaqqiffiusumik ilinniakkamik allamik piffissaliussap iluani, Namminersorlutik Oqartussanit ilinniagaqarnersiuteqarlutik ingerlatsiniarlutik, taava tamanna ilinniagaqarnersiutaannarnut ukiumut katillugit 1.160.000 kr.-inik naleqassaaq. Taakkununga ilanngunneqassapput taaneqareersut immikkut tunniunneqartartut, soorlu atuakkanut tapit, akiliunneqarluni angalanerit, taarsigassarsianut aningaasartuutit il.il. Tassunga atatillugu paasisutissat pigineqartut tunngavigalugit erseqqissumik eqqoriarneqarsinnaanngilaq ilinniagaqartut qassit periarfissamik taassuminnga atuiumaarnissaat, imaappoq ingerlaqqiffiusumik ilinniakkat tamakkiisut marluk naammassinissaannut ilinniagaqarnersiutininik tunineqarnissamat periarfissaq pilersinneqassagaluarpat nalinginnaasumillu atugaalissappat.

Naatsorsuutigineqassaarlu ingerlaqqiffiusumik ilinniakkamik allamik ingerlatsinnaanermut ilinniagaqarnersiutisisinnaaneq periarfissaalissappat, tamassuma inuiaqatigiinnut toqqaannangitsumik kinguneqarnissaa, tassa soorlu kollegiani inissanik pisariaqartitsinerup annertusinissaa. Kiisalu tamanna sulisussat pisariaqartinneqartut suli amerlanerusut amigaatigineqalernerannik kinguneqassaaq, soorlu inuk ilinniartitsisutut ilinniagalik ilinniakkani atuarfimmi ilinniarsimasunik amigaateqarfioqisumi atornagu ingerlaqqiffiusumik ilinniakkamik allamik tamakkiisumik inuiaqatigiit akiligaannik aallartitsiniarluni aalajangerpat.

*Apequt 4: Tassunga tunngasumik Naalackersuisut allamik oqaasissaqarpat?*

**Akissut:**

Naagga.

Inussjarnersumik inuulluaqqusilunga



Aqqaluaq B. Egede